

## RESOLUCIÓN DA AXENCIA PARA A MODERNIZACIÓN TECNOLÓXICA DE GALICIA POLA QUE SE DECLARAN ACTUACIÓNS ADMINISTRATIVAS AUTOMATIZADAS

A Lei 39/2015, do 1 de outubro, do procedemento administrativo común das administracións públicas establece a obrigatoriedade de recibir todas as notificacións por vía exclusivamente electrónica para determinados colectivos. Isto aplica unicamente a:

- Persoas xurídicas
- Entidades sen personalidade xurídica
- Profesionais colexiados/as
- Empregados/as das administracións públicas (no exercicio das súas funcións)
- Persoas que actúen en representación dos/as anteriores

O Sistema de Notificacións de Galicia, Notifica.gal, é o servizo que permite a cidadáns, empresas e administracións públicas recibir, de forma áxil e sinxela, as notificacións electrónicas enviadas pola Xunta de Galicia ou por calquera outra administración pública galega adherida a este sistema. Esta aplicación está deseñada conforme aos criterios establecidos para a práctica da notificación pola Lei 39/2015, do 1 de outubro, do procedemento administrativo común das administracións públicas

A Lei 40/2015, do 1 de outubro, de réxime xurídico do sector público, (en adiante só Lei 40/2015), integra as materias que demandaban unha regulación unitaria das relacións *ad intra* de cada Administración e das relacións entre elas, como a sinatura e as sedes electrónicas, o intercambio electrónico de datos en contornos pechados de comunicación e a actuación administrativa automatizada.

O artigo 41.1 da Lei 40/2015 define actuación administrativa automatizada como calquera acto ou actuación realizada integramente a través de medios electrónicos por unha Administración pública no marco dun procedemento administrativo e na cal non interviñese de forma directa un empregado público.

O artigo 41.2 da devandita lei determina que “en caso de actuación administrativa automatizada deberase establecer previamente o órgano ou órganos competentes, segundo os casos, para a definición das especificacións, programación, mantemento, supervisión e control de calidade e, se fose o caso, auditoría do sistema de información e do seu código fonte. Así mesmo, indicárase o órgano que debe ser considerado responsable para efectos de impugnación”.

A Orde do 6 de febreiro de 2014 pola que se aproba o protocolo de identificación e sinatura electrónicas da Administración xeral e do sector público autonómico de Galicia, no punto 3.4 do seu protocolo, determina que a creación de selos electrónicos realizárase mediante resolución das



secretarías xerais, secretarías xerais técnicas, direccións xerais ou persoa titular da dirección da entidade pública instrumental competente, que deberá ser publicada en sede electrónica.

Por todo o exposto,

**RESOLVO:**

**Primeiro.** Declarar as seguintes actuacións administrativas automatizadas a través de sistemas de información no ámbito do Sistema De Notificacións De Galicia, Notifica.gal:

- a) A emisión do xustificante de lectura das notificacións electrónicas por parte do titular, autorizado do titular, destinatario ou autorizado do destinatario.
- b) A emisión do xustificante de rexeite das notificacións electrónicas por parte do titular, autorizado do titular, destinatario ou autorizado do destinatario.
- c) A emisión do xustificante de modificación de datos persoais do interesado.
- d) A emisión do xustificante de modificación do medio de notificación preferente do interesado.
- e) A emisión do xustificante de creación de autorizacións para o acceso as notificacións electrónicas enviadas ao interesado.
- f) A emisión do xustificante que acredita a baixa do interesado do Sistema de Notificacións De Galicia, Notifica.gal.
- g) A emisión do xustificante de posta a disposición dunha notificación.
- h) A emisión do xustificante de rexeite da notificación por non acceder en prazo.

**Segundo.** Os órganos responsables en relación coas actuacións administrativas automatizadas relacionadas no apartado anterior serán:

- a) A Axencia para a Modernización Tecnolóxica de Galicia como órgano responsable da definición das especificacións destas actuacións administrativas automatizadas.
- b) A Axencia para a Modernización Tecnolóxica de Galicia como órgano responsable da programación, mantemento, supervisión e control de calidade e, no seu caso, auditoría do sistema de información e do seu código fonte.
- c) A Axencia para a Modernización Tecnolóxica de Galicia como órgano responsable para os efectos de impugnación.

**Terceiro.** Autorizar o uso do selo electrónico denominado “SISTEMA DE NOTIFICACIONES ELECTRONICAS DE GALICIA” para asinar as actuacións administrativas automatizadas declaradas nesta resolución e a realizar as tarefas técnicas precisas para a súa implantación efectiva nos sistemas automatizados que dan soporte as actuacións e procedementos mencionados.



**Cuarto.** Autorizar a renovación do selo electrónico “SISTEMA DE NOTIFICACIÓNS ELECTRÓNICAS DE GALICIA” sempre e cando continúen vixentes as actuacións administrativas automatizadas declaradas nesta resolución.

**Quinto.** A presente resolución producirá efectos desde o día da súa sinatura e publicarse na sede electrónica da Xunta de Galicia.

Santiago de Compostela,

Directora da Axencia para a Modernización Tecnolóxica de Galicia

Mar Pereira Álvarez

